

Transkription von Urkunde HGW 1321a

Ort, Datierung: Greifswald, 1321-05-05

Signatur: Landesarchiv Greifswald, Stettin Ducalia 32

Inhalt: Bischof Konrad, Otto I. von Pommern-Stettin, Wartislaw IV. von Pommern-Wolgast und Barnim III.: Bündnis mit Wizlaw III. von Rügen

In godes namen amen Wi Conrad biscop van Camin Otto Warzlawe Bamain hertoghen van Stetin bekennen openbare vnde betũghen m dessem breue dat wi vnde oser hertoghen ernamen ewelichan vnde jummermer willen vnde scolen stede vnde truwe vrent vnde eweghe helpere wesen vnde bliuen hern Witzlaues des edelen vorsten van Ruyen vses vrendes swagheres vnd omes vnde dar tũ siner rechten ernamen vp alle de dar leuen se sin in welliker achte se sin ofte in welleker welde ofte werdegheyt mid liue mid gũde mid steden mid mannen mid slothen mid lande vnde mid aller macht dor niner sake ofthe nod willen erer vortigen vnde wi ne scolen nen orloch antasten id en si mid sineme rade vnde vppe desse vrentscap vnd vorbindinghe dat se stede vnd ewich bliue des leghe wi hertoghen mid em tũsamende land man slothe vnde stede aldus bescedeliken Were dat des god nicht en wille quod¹ wi hertoghen storuen ane ernamen so tũhand scolden land man slote vnde stede vallen vnd erfuen vppe den vorsproken vorsten van Ruyen vnde vppe sine ernamen ewechliken tũ beholenden vnde tũ besiddende Hir neme wi vd land vnde slothe de de vorsproken biscop vnde dat godeshus van Camin mid vsen breuen vnd vser voruarn bewisen moghen Hiramme dat alle desse dingh gheholden werden vnde en jewelik stücke sunderlik so hebben en ghelouet darup al vse stede vnde al vse man vnd al vse slothe binnen der Pene vnde der Zwine Gripeswold Demin Anclam Wolgast vndem vnde vortmer Stetin vkermunde vnde Oldentrebetowe vnde van vs biscop Conrades weghene Colbergh Cosselin vnde Massow Were ouer dat de vanme Gripeswolde des louerdes anich wolden wesen nochten scal en jewelich stücke ganz vnde stede bliuen bi sik also id hir vore is bescreuen Vortmer were dat twischen den vorbenũmeden vorsten van Ruyen vnde den sinen af ene sid vnde twischen vs vnde vsen af ander sid jenich scelinghe worde oder twidrachtat scal men holden also id hir na bescreuen steyt Were dat den van Ruyen Jeghen vnser jenich sunderliken oder jeghen vs allen gicht scelede so scolden siner riddere twe inriden tũ deme Sunde vnde nemen twe ratmanne thõ sik in der suluen stad Darthũ scal vser en yeghen den he de scelinghe heft senden twe riddere vnde twe ratmanne van siner stede en tũ en in de stad tũ deme Sunde Dar scoln se de scelinghe jo sonen binnen verteynachten⁷) vnde dar nummer vdkomen se en si sonet endet vnde lendet vnde wat se darumme spreket ofthe settet dar scal id ganz bi bliuen Were ouer dat de dlingh nicht gheholden worden also se setten kundeghen odder spreken so scoln man slote stede vnd land sik holden an den heren vnd an sine ernamen de dat holden wil dat de vorbenũmeden riddere vnd ratmanne setten kundeghen vnde spreken also langhe bed he dat holde vnde vulte dat se sproken vnd kundeghet hebben Vortmer we des anderen bedarf thũ sinen noden de scal em vor tũspreken achte daghe Vortmer were dat men binnen sime lande des van Ruyen ofte vppe siner schede striden odder buwen rouen odder bernen wolde dar scole wi eme volghen mid aller macht vnde helpen vp vse kost vp vse verles vnd vp vse win na mantalen Vortmer buthen sime lande vnd buthen siner schede scole wi ome volghen vnde helpen in alle sinen noden mid hundert mannen vp orsen vppe sine kost vppe sin win vnde vp sin vorles So wanne he dat van vs eschet so scole wi se em antwerden vp vser landschede jhegen alle de dar leuen Dar scalme se vs wedder antwerden scadelos vppe dat alle des vorsproken deghedinghe stede vnde eweliken vast bliuen so hebbe wi

hertoghen vnde biscop Conrades man van Camin vnde vse man en truwen louet deme eddelen vorsten
van Ruyen de hir na screuen sint Henningh van Ekstede Henningh Bere de marscalc Jacob van
Westinghebrughe Hinric van Zagense Vicko Vos Gherard van Zwerin Claus Heyden Claus Luscow
Wedeghe van Būghenhaghen riddere Swantes van Bonin Bernard van der Borch knechte vnde hebbet
oc dartū he(n)ghed vse yngheseghele Dese bref is ghegheuen vnde gheuen ² in der stad tūme
Gripeswolde na godes bort dusent jar dreihundert jar in deme enentwinthechtesten jare in suntte
Johannes auende ewangelisten alse he wart ghesodden in derolgeboddene

¹ Verschreibung: **dat**

² Verschreibung: **screuen**